

Poblacion di Lion Fish ta aumentando atrobe

Campeonato mester cuminsa mas pronto posibel

ORANJESTAD - Apesar cu durante ultimo dianan no a sali mucho den prensa riba e topico di e pisca depredador Lions Fish, e problematica t'ey keto bay. For di cu Lion Fish a haci presencia den nos lama territorial, esaki a bira un punto di preocupacion grandi, ya cu e ta un sorto di pisca invasivo cu ta afecta cardinalmente nos fauna marino.

E Biologo Marino di Centro di Pesca Hadicurari, sr. Byron Boekhoudt a declara cu berdaderamente, despues di un temporada exitoso den cuadro di un campeonato di Lion Fish cu a caba dia 5 di December ultimo, no a ser scucha mas riba accion pa contraresta e pisca aki.

Un factor ta cu temporada di vakantie a drenta na vigor y esaki a contribui cu eventualmente tabatin un baho den tanto publicidad, ya cu un tipo di actividad asina ta depende hopi di e accion di e piscadonan y participantenan. Mester tene na consideracion cu durante luna di December ta ser registra un baho den e tipo di actividad asina, ya cu gran parti di e hendenan cu ta participa den dje, ta hendenan cu ta traha den industria di turismo y durante 'high season' ta dificil pa nan contribui den e lucha contra Lion Fish.

Durante e dianan aki ta birando hopi cla pa e buceadonan cu e Lion Fish ta bolbe aumenta na e sitionan unda durante e campeonato tabata mas controla. Tin caminda cu e buceadonan tabata haya nan hopi leu for di otro; y actualmente nan ta mira nan den gruponan te hasta di 6 pa 8 Lion Fish. Esaki ta un indicacion evidente



Aña pasa centro di Pesca Hadicurari a realisa un competencia exitoso pa asina contraresta e presencia di e pisca invasivo y depredador aki, pero esaki no tabata suficiente pa elimina presencia di Lion Fish for di nos lama.

cu e poblacion di Lion Fish ta aumentando atrobe, segun sr. Boekhoudt. E ta indica cu mester di e presion constante di ser humano pa controla e pisca feroz aki. "Esey ta mas cu claro cu si nos no a interveni, e ta bay keda aumenta y sali for di control...", segun sr. Byron Boekhoudt.

Pesey e ta haya cu e hendenan mester sigui motiva su mes pa elimina e Lion Fish, ya sea cu tin campeonato of no. E ta masha gradicido cu hopi di e participantenan a keda activo ariba nan mes, ya cu eliminacion di Lion Fish a bira practicamente un deporte caba ariba su mes; y ademá nan ta keda haciele pa e bon causa, locual ta algo di aplaudi.

CAMPAÑA 2012

Actualmente nan ta pendiente pa reinicia cu e campaña di elimina Lion Fish 2012; y nan ta spera di sali "a toda maquina", ya cu e

poblacion di Lion Fish a aumenta considerablemente. Pero pa esaki start e factor financiero tambe ta hunga un rol den dje, ya sea riba e parti di promocion como tambe riba e parti di incentivo pa e hendenan. Mester tene cuenta cu cada biaha cu e hende ta sali pa realisa e actividad aki di elimina Lion Fish, nan tin cu paga nan tankinan y ekiponan pa dive; ademá di gasolin pa bay cu e boto, etc... Pesey e estimulo ya sea den forma di premio of pago ta importante pa mantene e entusiasmo aki.

Riba e parti financiero nan ta pendiente riba un suma cu a ser priminti tentativamente for di instancia gubernamental, pero e ta kere cu e fundacion mester hunga un rol mucho mas activo den acerca comerciantenan of instancianan cu tin fondo pa donacion pa asina cuminsa cu e campeonato mas pronto posibel. "Mas tempo pasa, unda bo no ta pone e presion riba e poblacion di Lion Fish, mas grandi e problema lo bira", segun declaracion di e Biologo Marino. Awor nan ta pendiente cu Aruba Marine Park Foundation tuma e lider-



azgo atrobe pa inicia cu e proceso di recauda e fondonan necesario y asina anuncia e campeonato oficialmente.

E aña aki nan tin programa riba agenda pa bin cu un campeonato un fiki varia den otro estilo, unda lo paga directamente pa pisca. Y tambe paralelo na esaki, stimula e restaurantnan pa cuminsa cumpra e Lion Fish na un prijs premium pa e turistanan, ya cu di e forma aki tur hende lo sali

gana, y e ta yuda stimula e control riba Lion Fish den e areanan unda e hendenan por bucea. Sr. Boekhoudt ta kere cu den termino di dos siman e actividad nobo pa elimina Lion Fish lo keda propaganda.

E campaña anterior cu a resulta uno exitoso pa elimina Lion Fish, a ser auspiciá pa Aruba Marine Park Foundation cu contribucion di Centro di Pesca Hadicurari y Departamento di Pesca di Santa Rosa. □